

PROGRAMI PËR KOMUNËN E SARAJIT 2021-2025
KOALICIONI ALEANCA PËR SHQIPTARËT & ALTERNATIVA

SHTATOR 2021

Qeverisja e koalicionit Aleanca për Shqiptarët dhe Alternativa do të bazohet në parimet e qeverisjes së mirë duke nisur nga transparencja si dhe llogaridhënia. Qeverisja jonë do të bazohet në gjashtë shtyllat e programit tonë të përgjithshëm komunal 2021-2025:

1. Pastër: qeverisja e mirë dhe transparencja
2. Komuna demokracisë pjesëmarrëse
3. Administrata komunale efikase, moderne dhe në shërbim të qytetarëve
4. Komuna e mirëqenies për të gjithë
5. Komuna me zhvillim të qëndrueshëm lokal
6. Komuna me rend dhe plan në çdo cep

Masat e propozuara në këtë program nuk janë medoemos përgjegjësi direkte e autoriteteve lokale, por ato pasqyrojnë në mënyrë gjithëpërfshirëse dhe koherente politikën që Koalicioni Aleanca për Shqiptarët dhe Alternativa synon të zbatojë në nivelin lokal. Ne besojmë se decentralizimi dhe fuqizimi i mëtejshëm i komunave tona varet në masë të madhe nga politikën dhe infrastruktura rregullative në nivelin qendror. Andaj do të vazhdojmë të ndjekim dhe të shtymë prioritetet horizontale të programit tonë qendror “Shtet për të Gjithë” 2020-2024.

Këto prioritete kanë të bëjnë me parakushtet themelore për një vetëqeverisje lokale efikase, efiçente dhe në shërbim të interesit dhe nevojave të qytetarëve në nivelin lokal, me synim të ofrimit të një shërbimi cilësor dhe të barabartë për të gjithë. Ato përfshijnë ndër tjera zbatimin e një modeli të mirëfilltë decentralizimi, zhvillim të barabartë rajonal dhe ndaljen e politikave diskriminuese të zbatuara nga niveli qendror, si dhe avancimin e kornizës ligjore me qëllim të forcimit të rritjes së subsidiaritetit dhe kapacitetit të komunave për të përmbushur misionin e tyre. Me plotësimin e këtyre parakushteve do të mundësohet vetëqeverisje lokale efikase dhe efiçente, në shërbim të qytetarëve.

1. Pastër: qeverisja e mirë dhe transparencja

Korrupsioni i lartë i politikanëve të partive që tradicionalisht kanë udhëhequr me vendin në dy dekadat e kaluara, korrupsion ky që është endemik dhe i përhapur në çdo sferë të jetës shoqërore, ka dëmtuar në masë të madhe besimin e qytetarëve ndaj politikës dhe çështjeve publike. Duke qenë se fuqizimi i nivelit lokal është pjesë e ADN-në së koalicionit tonë, dëshmuar në qeverisjet tona të deritanishme komunale, ne konsiderojmë si urgjent rikthimin e besimit të qytetarëve në politikën, në veçanti në komunë, si niveli më i afërt me brengat e përditshme të qytetarëve.

Mbrojtja e interesit të përgjithshëm, ndershmëria dhe transparencja në ushtrimin e funksionit publik janë lajtmotivi apo elementet thelbësore të partisë sonë. Komuna duhet të jetë pararojë kundër cenimeve që i kanosen demokracisë. Ne angazhohemi për transparencën e plotë të vendimeve politike, përmes të gjitha kanaleve të komunikimit për t’u mundësuar qytetarëve dhe shoqërisë civile që të kërkojnë veprime konkrete dhe llogaridhënie nga përfaqësuesit politikë të tyre.

Koalicioni Aleanca për Shqiptarët dhe Alternativa angazhohet për qeverisje me duar të pastra: transparencë, llogaridhënie, qeverisje të mirë dhe me zero tolerancë ndaj korrupsionit. Ne zotohemi për:

- ✓ Transparençë të plotë për shpenzimet operative komunale (open data).
- ✓ Zyrë për auditim të brendshëm që i raporton komitetit për auditim.
- ✓ Kod të etikës për përfaqësuesit politikë në nivel komunal.
- ✓ Rekrutim transparent dhe objektiv të personelit komunal dhe të strukturave nën përgjegjësinë e komunës dhe rritja e transparencës së arsyeve të pushimit nga puna.
- ✓ Shkarkimi i menjëhershëm i zyrtarëve komunalë ndaj të cilëve merret vendim gjyqësor i formës së prerë në çështje penale.
- ✓ Zhvillimi i interaktivitetit të web faqeve të komunës, përfshirë transmetimin e drejtpërdrejtë të mbledhjeve të këshillit komunal.
- ✓ Zbatimi i përpiktë i ligjit për përdorimin e gjuhëve dhe garantimi i të drejtave gjuhësore të qytetarëve.
- ✓ Përfaqësimi i drejtë dhe adekuat i komuniteteve dhe përfaqësim i ekuilibruar gjinor.

2. Komuna e demokracisë pjesëmarrëse

Koalicioni Aleanca për Shqiptarët dhe Alternativa angazhohet për pjesëmarrje të qytetarëve në vendimmarrje, mbështetje të shoqërisë civile lokale, forcim të solidaritetit, efikasitet dhe cilësi të shërbimeve komunale, si dhe promovim të projekteve inovative dhe të qëndrueshme për të bërë jetën komunale më dinamike. Komuna do të jetë e hapur për të gjithë pavarësisht përkatësisë etnike, fetare apo partiake.

Decentralizimi dhe bashkëpunimi nder komunal

Koalicioni Aleanca për Shqiptarët dhe Alternativa do të angazhohet për forcimin e strukturës institucionale lokale, me qëllim të rritjes së efikasitet dhe të cilësisë së shërbimeve për qytetarët. Dy akset kryesore dhe komplementare që do të ndjekim drejt këtij qëllimi janë: forcimi i rajoneve planore dhe rritja e bashkëpunimit mes tyre dhe komunës, dhe avancimi i bashkëpunimit nder komunal.

Demokracia pjesëmarrëse

Ne do të inkurajojmë demokracinë pjesëmarrëse për t'u mundësuar qytetarëve që të rrisim interesimin e tyre për çështjet publike, do të nxisim pjesëmarrjen në jetën e komunës dhe do të rrisim ndikimin pozitiv të qytetarëve mbi përfaqësuesit e tyre të zgjedhur. Në këtë rrafsh, propozimet tona janë:

- ✓ Krijimi i një platforme informative që u mundëson qytetarëve të përfshihen më drejtpërdrejtë në zhvillimin e projekteve komunale dhe në procese të caktuara vendimmarrëse.
- ✓ Publikimi dhe thjeshtëzimi i buxhetit komunal në një formë të qartë dhe vizuale.
- ✓ Publikimi në web faqen e komunës të regjistrit i të gjitha organizatave (OJQ, shoqata, klube sportive, etj.) që marrin subvencione komunale.
- ✓ Sinjalizimi i qartë informativ pranë punishteve, ku sqarohet qëllimi i projektit, kohëzgjatja, kostoja, autoritetet përgjegjëse, përfshirë edhe ilustrime projektuese dhe të dhënat kadastrale.
- ✓ Krijimi i një aplikacioni komunal për informim të drejtpërdrejtë të qytetarëve dhe ndërveprim në kohë reale me autoritetet komunale.

- ✓ Sistematizimi në secilën komunë të kornizës ligjore për pjesëmarrjen qytetare.
- ✓ Transparencë e plotë e dokumenteve të projekteve të reja infrastrukturore, të cilat do të jenë të qasshme në një sallë të dedikuar për këtë qëllim në komunë.
- ✓ Mekanizma të demokracisë pjesëmarrëse lokale, siç janë iniciativat qytetare, petitionet, pyetjet për kryetarin e komunës dhe këshilltarët si dhe referendumet lokal.
- ✓ Krijimi i një buxheti pjesëmarrës;
- ✓ Sistematizimi i bordeve / këshillave konsultative (planifikim hapësinor, zhvillimi rural, arsim, aftësim profesional, fëmijët, të rinjtë, të moshuarit, personat me aftësi të kufizuara, etj.).

3. Administrata komunale efikase, moderne dhe në shërbim të qytetarëve

Shërbime komunale cilësore për të gjithë

Me qëllim të rritjes së efikasitetit dhe efektshmërisë së shërbimeve komunale, ne angazhohemi gjithashtu për promovimin dhe zbatimin e modelit të qeverisjes ndër-komunale, krahas forcimit të rajoneve planore dhe rritjes së bashkëpunimit mes tyre dhe komunës. Koalicioni Aleanca për Shqiptarët dhe Alternativa propozon:

- ✓ Organizimi më i mirë dhe i hapur i pritjes së qytetarëve në godinën komunale.
- ✓ Instalimi i sporteveve elektronike që ofrojnë shërbime të përhershme, 24 orë në ditë, 7 ditë në javë.
- ✓ Qasje më e mirë në infrastrukturën komunale për personat më lëvizshmëri të zvogëluar.
- ✓ Promovimi i një shërbimi cilësor dhe me kosto më të ulët për qytetarët në sektorët e shpërndarjes së ujit, planifikimit hapësinor apo trajtimit të mbeturinave.
- ✓ Hapja e zyrës së veçantë për diasporën.

Transformimi digjital dhe e-qeverisja

Qeverisja elektronike ose e-qeverisja, përveç se ndihmon në efikasitet, ajo i ulë edhe kostot komunale. Ne do të angazhohemi për zbatimin e masave në vijim:

- ✓ Digjitalizimi i infrastrukturës administrative komunale.
- ✓ Një platformë unike online që do të përfshijë edhe ndërmarrjet publike përkatëse, sidomos ujësjellësin dhe do të shoqërohet me një aplikacion komunal për informim të drejtpërdrejtë të qytetarëve dhe ndërveprim në kohë reale.
- ✓ Zbatimi i një politike të të dhënave të hapura (*open data*) dhe qasje e lirë në të dhënat me karakter të interesit publik, për transparencë totale të përdorimit të mjeteve komunale, rekrutimeve në administratë dhe një menaxhim më të mirë të komunës.
- ✓ Fond special për investime në teknologji, për mirëmbajtjen e infrastrukturës digjitale dhe modernizimin e saj.
- ✓ Forcimi i rrjetit të ndriçimit rrugor dhe ndriçimi inteligjent (ndriçim bazuar në detektimin e lëvizjeve).

- ✓ Mbështetja e modaliteteve të reja të transportit publik (*car pooling* dhe *car sharing*) përmes teknologjive dhe platformave bashkëpunuese digjitale.
- ✓ Zhvillimi i infrastrukturës inteligjente për menaxhimin e trafikut.
- ✓ Krijimi i qendrave për inovacion (“Innovation Hubs”), inkubatorë dhe akceleratorë, qendra për arsim joformal dhe biblioteka digjitale publike.
- ✓ Krijimi i një web faqe dhe një aplikacioni komunal apo ndërkomunal që promovojnë monumentet dhe hapësirat me interes turistik dhe ofertën hoteliere, përfshirë bujtinat rurale private.

Siguri në çdo cep të komunës

Ne do të zbatojmë politikë të zero tolerancës ndaj veprime delikuede dhe degraduese të hapësirës publike. Do të zbatojmë përgjigje shumëdimensionale përmes edukimit, informimit, parandalimit, politikave të afërsisë me qytetarët dhe planifikimit të duhur të hapësirës publike.

- ✓ Në bashkëpunim me autoritetet qendrore, organizimi i kornizës ligjore për krijimin e një shërbimi komunal parandalues (“paqeruajtës”) përgjegjës për parandalimin e veprimeve delikuede dhe degraduese të ambientit apo infrastrukturës komunale, përfshirë sigurinë përreth shkollave tona dhe objekteve komunale.
- ✓ Dënime administrative për të gjitha veprimet delikuede dhe degraduese të hapësirës publike.
- ✓ Instalimi i një sistemi të kamerave inteligjente.
- ✓ Zbatimi i një plani të ndriçimit të qëndrueshëm, i cili mundëson vënien në pah të trashëgimisë komunale dhe kontribuon në rritjen e ndjenjës së sigurisë.
- ✓ Forcimi i shërbimeve zjarrfikëse.
- ✓ Zgjidhja e problemit të qenve dhe maceve endacake, duke u dhënë një subvencion qytetarëve që duan të sterilizojnë dhe çipojnë qentë dhe macet e tyre dhe duke krijuar strehimore rajonale për qentë endacakë. Ne gjithashtu do të krijojmë një shërbim veterinar komunal, përgjegjës për capimin e qeneve endacakë, sterilizimin e tyre dhe krijim e një databaze, në bashkëpunim me shoqatat për mbrojtjen e kafshëve.
- ✓ Themelimi i njësitit të Zjarrfikësve për territorin e komunës së Sarajit

4. Komuna e mirëqenies për të gjithë

Vizioni jonë për vetëqeverisjen lokale është rritja e investimeve në kapitalin tonë mjedisor dhe atë njerëzor, duke u përqendruar në këto prioritete: mjedisi, arsimit, shëndetësia, mbrojtja sociale, kultura dhe sporti.

Mbrojtja e natyrës dhe e mjedisit jetësor

- ✓ Përmirësimi i cilësisë së ajrit, duke ngritur koordinimin me autoritetet qendrore dhe duke krijuar një regjistër lokal për matjen e cilësisë së ajrit, favorizuar makinat elektrike apo me gaz për nevojat e shërbimeve komunale, rritur numrin e shtigjeve për biçikleta, subvencionimin e biçikletave, mbjelljen e druve dhe shpërndarjen e druve zbukurues dhe pemor falas për çdo qytetar të interesuar.

- ✓ Mbështetja e ekonomisë qarkore në menaxhimin e mbeturinave nga një perspektivë ndërkomunale.
- ✓ Rritja e frekuencës së pastrimit të rrugëve dhe të numrit të pastruesve.
- ✓ Monitorim i përhershëm i pastërtisë publike, përmes një raporti vjetor që do të paraqitet në këshillin komunal.
- ✓ Vendosja e kontejnerëve inteligjentë.
- ✓ Grumbullimi nga ndërmarrjet komunale të gjësendeve të mëdha si mobile të vjetra dhe pajisje shtëpiake, të destinuara për riciklim dhe ridestininim përmes një platforme bashkëpunuese (B2B dhe B2C).
- ✓ Zbatimi i klasifikimit selektiv të mbeturinave në hapësirën publike.
- ✓ Inkurajimi i nismave lokale që synojnë luftimin e shpërdorimit të ushqimit të pa shitur, duke i ndërlidhur këta aktorë ekonomikë me shoqatat që u ndihmojnë njerëzve në vështirësi.
- ✓ Ruajtja, mirëmbajtja dhe rritja e hapësirave të gjelbra, zonave natyrore si dhe mbrojtja e biodiversitetit.
- ✓ Instalimi i rezervuarëve për mbledhjen e ujit të shiut në ndërtesat në pronësi apo menaxhim të komunës.
- ✓ Subvencione shtesë krahas atyre qeveritare, për të inkurajuar kursimin e energjisë.
- ✓ Krijimi i një zyre komunale të energjisë e cila centralizon të gjithë informatat e dobishme rreth përdorimit efikas të energjisë dhe subvencionet qeveritare dhe komunale i cili gjithashtu këshillon dhe përkrah qytetarët në aplikimet e tyre për subvencione.
- ✓ Krijimi i një sektori komunal për mbrojtjen e mjedisit.
- ✓ Në Komunën e Sarajit, siç e dimë, ka ndodhur një kaos i madh urban, sepse njerëz të caktuar – natyrisht me leje të Komunës – janë bërë uzurpatorët më të mëdhenj të pronës publike, duke zaptuar parqe, hapësira të lira, parkingje dhe duke bërë ndërtesa pa kushte minimale banimi, gjithë kjo vetëm për përfitime personale të caktuara. Kjo e ka ngarkuar trafikun, ka shkaktuar mungesë të parkingjeve, e ka ngarkuar rrjetin e ujësjellësit dhe të kanalizimit, ashtu që tash në Saraj ndjehet edhe mungesa e hapësirave të lira publike, edhe mungesa e parkingjeve.
- ✓ Përmes qasjes edukuese (shkollave dhe OJQ-ve) do të synohet të fuqizohet vetëdija e banorëve të Sarajit për pronën publike dhe ruajtjen e mjedisit jetësor. Kujdesi për atë që është e përbashkët do ta bëjë Sarajin komunë më të pastër dhe komunë të cilën të gjithë do ta ndjejnë si shtëpi të tyre.

Shëndetësia

Komuna do të promovojë shëndetin në të gjitha politikat lokale me qëllim të ofrimit të shërbimeve cilësore në gjithë komunën tonë. Ne propozojmë:

- ✓ Bashkimin e shtëpive të shëndetit me spitalet e përgjithshme të qytetit.
- ✓ Rritje të investimeve në renovimin e infrastrukturës në poliklinikën e Sarajit

Arsimi

Prioriteti ynë kryesor do të jetë modernizimi dhe përmirësimi i procesit arsimor. Kujdesi për mësimdhënie dhe kushte cilësore në shkolla do të jenë preokupim ynë i përditshëm, duke u fokusuar në prioritetet në vijim:

- ✓ Rritja e numrit të vendeve në çerdhe drejt objektivit të një normë mbulimi (numri i vendeve në çerdhe në raport me numrin e fëmijëve) prej 33%.
- ✓ Inkurajimi i krijimit të strukturave plotësuese, siç janë çerdhet me bazë në komunitet, çerdhet private dhe forma tjera siç janë kujdesi ditor.
- ✓ Përmirësimi i infrastrukturës shkollore dhe planifikimi i hapësirave të reja shkollore, në veçanti projektet në vijim.
- ✓ Klube për inovacion në shkollat fillore dhe të mesme.
- ✓ Hapja e qendrave për aftësim profesional dhe krijimi i qendrave rajonale për të mbështetur arsimin joformal.
- ✓ Krijimi i një komiteti konsultativ për arsim fillor dhe të mesëm në nivel komunal, ku do të marrin pjesë përfaqësues të sektorit privat, qeverisjes lokale dhe shkollave fillore dhe të mesme në nivel të komunës.
- ✓ Fondi i përkrahjes së shkollave për organizimin e aktiviteteve jashtë shkollore.
- ✓ Programe vjetore komunale për trajnim të arsimtarëve.
- ✓ Krijimi i së paku një ndërmarrje në çdo shkollë të mesme profesionale, e cila ofron apo prodhon shërbime.
- ✓ Hapja e klasave për qëndrim tërëditor për nxënësit deri në klasën e katërt.
- ✓ Vizita vjetore mjekësore në të gjitha nivelet e arsimit komunal.
- ✓ Angazhimi i një orto pedagogu përgjegjës për zbulim të vështirësive dhe çrregullimeve në të mësuarit tek fëmijët, në parashkollore dhe në shkollë fillore.
- ✓ Rritja e inkluzivitetit për nxënësit me nevoja të veçanta.
- ✓ Bursa për fëmijët e talentuar apo nga familjet me nevojë.
- ✓ Shpërndarja në çerdhe dhe shkolla fillore e një shujte ditore falas.
- ✓ Inkurajimi i krijimit të shoqatave të prindërve dhe përfshirja e tyre në projektet arsimore komunale si dhe në jetën shoqërore të lagjes dhe fshatit.

Mbrojtje sociale dhe politikat inkluzive

Do të planifikojmë politika gjithëpërfshirëse për kategoritë të veçanta sociale, në veçanti=

- ✓ Promovimi i integritit socio-profesional të personave me aftësi të kufizuara dhe ndërmarrja e masave për të promovuar autonominë e tyre.
- ✓ Qasje e lehtësuar në objektet në pronësi dhe menaxhim të komunës për njerëzit me lëvizshmëri të reduktuar.
- ✓ Zbatimi i projekteve gjithëpërfshirëse në shkollat dhe çerdhet komunale, për të promovuar përfshirjen në shoqëri të fëmijëve me aftësi të kufizuara ose me vështirësi në të mësuar.
- ✓ Qendër për autizëm.
- ✓ Zhvillimi i shërbimeve për të moshuarit, përfshirë ndërtimi i një shtëpie për të moshuarit dhe i një qendre ditore për të moshuarit.
- ✓ Inkurajimi i krijimit të restoranteve sociale dhe të shitoreve sociale, në bashkëpunim me aktorët ekonomik (shitore, tregje, etj) dhe shoqërinë civile.
- ✓ Investimi në ndërtimin e kapaciteteve të reja për strehimin e personave në rrezik shoqëror, përfshirë viktimat e dhunës seksuale, dhunës në baza gjinore dhe viktimave të trafikimit me qenie njerëzore.

Kultura

Banorët e komunës do të krenohen me pasurinë kulturore, trashëgiminë kulturore dhe rendësinë historike të pasurisë sonë arkitektonike dhe kulturore. Ne prozojmë:

Edhe kultura është element i rëndësishëm i avancimit të një kombi. Identiteti i një kombi krijohet përmes kulturës. Për këtë qëllim, si drejtues të Komunës së Sarajit, do të ndihmojmë në fuqizimin e ansambleve aktuale folklorike, do të ndihmojmë në krijimin e grupeve të ndryshme muzikore të të gjitha zhanreve, do të nxisim organizim të festivaleve për fëmijë, festivaleve të muzikës së lehtë dhe asaj popullore, do të stimulohen artistët figurativë, si dhe shkrimtarët që gravitojnë në Komunën e Sarajit, që secilin muaj të këtë dhjetëra aktivitete kulturore, ndërsa për realizimin e tyre do të angazhohemi për një shtëpi kulture enkas në Komunën e Sarajit.

Sporti

Synimi ynë është që komuna të gëzojë pozicion të favorshëm kombëtar në sferën e sportit. Do të inkurajojmë një jete aktive dhe të shëndoshë me të cilën në veçanti do të përfitojë të rinjtë. Ne propozojmë:

Sporti nuk është vetëm mënyrë argëtimi dhe kujdesi për shëndetin, që janë gjithsesi shumë të rëndësishme, por njëherazi paraqet edhe identitetin e një komuniteti. Një komunitet që merret me sport nënkupton një komunitet që është larg dukurive devijuese. Ndonëse në Saraj, në kuadër të Qendra Rekreativo-Sportive Saraj si dhe në disa fshatra tjera, ekzistojnë disa stadium futbollit dhe disa shkolla private sporti të lëna krejtësisht pas dore, angazhimi i Komunës së Sarajit për sportin ka qenë dhe mbetet minimal.

- ✓ Për këtë arsye ne mendojmë se Sarajit i duhet një qendër më e madhe sportive, që do të krijohet për të stimuluar më shumë sporte, ndërsa do të jetë identiteti i banorëve të saj. Mendojmë se Qendra Rekreativo-Sportive Saraj është bazë shumë e mirë për ta kultivuar një sport shumë të shëndoshë dhe për ta kthyer këtë qendër në një vend që gjatë fundjavave do frekuentohet nga të gjithë banorët e Shkupit. Kjo pos përmirësimit të reputacionit të komunës, do ketë edhe impakt direkt në zhvillimin e Komunës.
- ✓ Ne do t'i qasemi seriozisht investimeve në infrastrukturën sportive. Do të kujdesemi rregullisht për pajisjet dhe mirëmbajtjen e fushave sportive të hapura, të lënë pas dore nga pushteti i mëparshëm. Do të bëjmë hapjen e qendrave rinore. Do të bëjmë organizimin dhe përkrahjen ngjarjeve sportive. Do t'i mbështesim talentet sportiv dhe do të bëjmë promovimin e tyre.
- ✓ Në bashkëpunim me sportistë me renome nga komuna jonë do të bëjmë themelimin e një klubi futbollistik për gara në ligën e seniorëve.
- ✓

Do të bëjmë përpilimin e strategjisë komunale për rini 2021-2025. Me qëllim të mbështetjes së sportit do të bëjmë binjakëzim me komuna nga Evropa si dhe komuna nga vendet tjera për bashkëpunim në sferën e sportit

4. Komuna me zhvillim të qëndrueshëm lokal

Zhvillimi i ekonomisë lokale dhe i punësimit

Ne jemi të përkushtuar për fuqizimin dhe zhvillimin e NVM-ve, përmirësimin e kushteve dhe rrethanave për krijimin e ndërmarrjeve të reja dhe mbështetjen e bizneseve lokale. Në bashkëpunim me ekspertët, sektorin e biznesit si dhe organizata të ndryshme do të krijojmë kushte edhe për tërheqjen e investimeve të huaja, përfshirë nga diaspora, për të siguruar një zhvillim të qëndrueshëm lokal si dhe vende të reja pune.

Komuna jonë do të jetë një vend i zhvilluar ekonomikisht si dhe krijimin e vendeve të reja të punës. Ajo do të inkurajojë, udhëzojë dhe orientojë qytetarët në kërkimin e një vendi pune, por gjithashtu do të zhvillojë bashkëpunim me organizata të ndryshme qendrore siç është Agjencia e Shërbimit të Punësimit, odat ekonomike dhe institucionet e arsimit profesional, në mënyrë që të inkurajojnë qytetarët që të orientohen drejt vendeve të punës deficitare ose aftësimi profesional. Në këtë rrafsh, propozimet tona janë:

Me qëllim të përmbushjes së objektivave të lartpërmendura administrata komunale do të jetë vazhdimisht në shërbim të bizneseve dhe investitorëve potencialë dhe do të sigurojë informacione të vazhdueshme mbi burimet në dispozicion të komunës (toka, etj.); në vazhdimësi do të bëhet trajnimi i administratës për thithjen e fondeve dhe donacioneve nga shtete të ndryshme; do të themelohet një zyrë që do të jetë në shërbim të bizneseve të vogla; do të bëhet promovimi i ekonomisë vendore (prodhimeve bujqësore në Komunë e Sarajit); do të shqyrtohet mundësia për ndertin e një tregu; në bashkëpunim me biznesmenë dhe me industrinë e përpunimit do të bëjmë ndërtimin e pikave mbledhëse për produktet bujqësore; do të angazhohemi për thithjen e fondeve ndërkombëtare për bujqësi; fonde për zhvillim të biznesit; organizimin e një panairi tradicional vjetor për promovimin e prodhimeve dhe pasurive vendore si dhe promovimin e tyre në paniret ndërkombëtare, sidomos potencialin e Liqenit Treska dhe grykës Matka si potencial për investitorët dhe turistët vendorë dhe të huaj.

Në sferën e urbanizmit do të përpilojmë dhe sjellim plane të reja urbanistike detale, do të bëjmë modernizimin e infrastrukturës komunale në Komunën e Sarajit përmes një plani katërvjeçar për programet e zhvillimit dhe investimeve në fushën e ndërtimit të ndërtesave, furnizimit me ujë, rrjeteve të kanalizimit ndërtimit, rindërtimit dhe rehabilitimit të rrugëve lokale dhe rrugicave si dhe pastrimin e lumenjve.

Turizimi

- ✓ Rinovimi i atraksioneve turistike dhe i trashëgimisë arkitektonike komunale me interes për turistët.

- ✓ Krijimi i një web faqe dhe një aplikacioni komunal që listojnë dhe promovojnë monumentet dhe hapësirat me interes turistik brenda territorit të komunës, turizmin rural, si dhe ofertën hoteliere, përfshirë bujtinat rurale private.
- ✓ Zhvillimi i një rrjeti shtigjesh dhe shëtitjesh të gjelbra, malore dhe rurale.
- ✓ Sa i përket kulturës, Xhamia Husein Shah është një element shumë i rëndësishëm për banorët e Komunës së Sarajit. Angazhimi jonë është që kjo xhami me rolin dhe historikun e saj pos që do t'u përcillet gjeneratave të reja, gjithashtu Xhaminë Hysein Shah do e futim në të gjitha guidat e objekteve kulturore dhe turistike në nivel të shtetit dhe të rajonit. E njëjta gjë do të bëhet edhe për Manastirin Shën Maria.
- ✓ Komuna e Sarajit posedon shumë bukuri te veçanta natyrore dhe tradite te pasur kulturore të trashëguar gjeneratë pas gjenerate. Në këtë drejtim do të përgatitet një studimi i fizibilitetit për zhvillimin e turizmit alternativ dhe mbështetjen e zhvillimit të turizmit rural në fshat dhe turizmi malor.
- ✓ Do të bëjmë përpilimin e një harte turistike si dhe do të bëjmë vendosjen e tabelave dhe shenjave për të shënuar vendet e rëndësishme natyrore (Gryka Matka, Liqeni Treska, Burimi i ujit Vrella (në fshatin Rashçe). Gjithashtu edhe për lumenjtë, grykat dhe të gjitha monumentet historike në territorin e Komunës.

5. Komuna me rend dhe plan në çdo cep

Planifikimi urban dhe rural

Do të përqendrohemi në modernizimin dhe adresimin e pabarazisë në sektorët e mobilitetit, rrugëve, infrastrukturës komunale, planifikimit hapësinor, tokës ndërtimore, urbanizmit dhe energjisë. Prioritete të veçanta do të kenë rritja e konektivitetit lokal dhe atij rajonal, si dhe avancimi dhe modernizimi i infrastrukturës lokale, veçanërisht sa i përket ujit të pijshëm, kanalizimeve dhe trajtimit të ujërave të zeza. Komuna do jetë vend me infrastrukturë më të përparuar duke adaptuar planin zhvillimor me nevojat investuese në infrastrukturë.

Ne promovojmë arritjen e objektivave të zhvillimit të qëndrueshëm të vendosura nga instancat ndërkombëtare dhe evropiane që synojnë uljen drastike të konsumit energjetik, ruajtjen dhe mirëmbajtjen e hapësirave të gjelbra, zonave natyrore dhe mbrojtjen e biodiversitetit.

Ne angazhohemi gjithashtu për promovimin e trashëgimisë lokale, natyrore dhe arkitekturale, duke riorganizuar hapësirën publike në mënyrë estetike dhe të qëndrueshme.

Planifikimi hapësinor në nivelin komunal duhet të synojë ngrirjen e zgjerimit urban anarkik, në dëm të hapësirave të gjelbra, pyjeve dhe tokës bujqësore. Dendësimi i territorit do të favorizojë zhvillimin e formave të banimit më të përshtatura me sfidat mjedisore dhe nevojat dhe mundësitë financiare të çifteve të reja, që janë viktimat e para të rritjes së çmimeve të patundshmërisë.

Për të arritur këto objektiva, propozojmë:

- ✓ Ujë të pijshëm, rrugë cilësore dhe kanalizime për të gjitha vendbanimet(sigurimi i rrjetit të Ujit për fshatin Bukoviç dhe Laskarcë)
- ✓ Miratimi i planit të ri urbanistik me qëllim të zbatimit të normave urbanistike evropiane, ngrirjes së zgjerimit urban anarkik, dhe ruajtjes dhe zgjerimit të hapësirave të gjelbra, pyjeve dhe tokës bujqësore.
- ✓ Miratimi i udhëzimeve të qarta dhe transparente mbi politikën e lejeve të ndërtimit.
- ✓ Miratimi i një plani të zhvillimit rural që synon promovimin e një arkitekture dhe një peizazhi që valorizon kontekstin lokal historik, mjedisin dhe banimin e qëndrueshëm.

Mobiliteti

Vlerësojmë se promovimi i një mobiliteti bashkëkohor dhe të qëndrueshëm është domosdoshmëri, ku ndarja e hapësirës publike është e ekuilibruar midis këmbësorëve, çiklistëve dhe automjeteve. Ne i kushtojmë rëndësi të veçantë mobilitetit, si mjet thelbësor i zhvillimit lokal, me pasoja direkte në aktivitetin ekonomik, krijimin e hapësirave të jetesës së përbashkët për të gjithë përdoruesit dhe përmirësimin e qasjes në objekte tregtare. Propozimet tona janë:

- ✓ Regjistri i rrjetit rrugor komunal dhe rajonal.
- ✓ Krijimi i një regjistri të vendeve me shkallë të lartë të aksidenteve të trafikut.
- ✓ Identifikimi i rregullt i trotuareve të dëmtuara dhe intervenimi i shpejtë për të sanuar gjendjen.
- ✓ Miratimi i planit të çiklizmit, përfshirë zgjerimin e shtigjeve të biçikletave, subvencionimin e blerjes së tyre dhe bashkëpunimin me shoqatat e çiklistëve.

Banimi i qëndrueshëm dhe i përballueshëm

Shtërngimi i rregulloreve të planifikimit urban dhe mungesa e ofertës së banimit të vogël dhe të mesëm, çon pashmangshëm në rritje të çmimeve të patundshmërisë dhe sjell pasoja tjera për mënyrën e jetesës dhe mobilitetin. Ne propozojmë:

- ✓ Promovimi i krijimit të njësive të reja banesore të adaptuara me sociologjinë e komunës, në bashkëpunim me autoritetet tjera publike dhe sektorin privat.
- ✓ Promovimi i projekteve mikste të ndërtimit në kuadër të zhvillimit urban. Objektet e reja duhet të kombinojnë funksionet e banimit, tregtisë, zyrave, kulturës, duke marrë gjithashtu parasysh mobilitetin (vendet e parkimit) dhe çështjet mjedisore.
- ✓ Krijimi i agjencisë së patundshmërisë sociale, duke inkurajuar pronarët t'i besojnë komunës administrimin e pronës së tyre.
- ✓ Lehtësimi i blerjes së shtëpisë apo banesës së parë për çiftet e reja, duke i stimuluar kompanitë që t'u shesin atyre me çmime pa profit dhe duke i liruar çiftet e reja nga pagesa e tatimit në pronë për aq kohë sa ata paguajnë këste të kthimit të kredisë banesore pranë një institucioni financiar.